

東都事畧卷第十八

宋王偁撰

掃葉山房校刊

列傳一

范質字文素大名宗城人也母張氏夢人授五色筆而質生九歲
善屬文唐長興中舉進士爲忠武軍推官晉天福中懷其文見宰
相桑維翰維翰奇之擢監察御史稍遷主客員外郎直史館召入
翰林爲學士契丹入寇晉出帝命十五將出征是夕質宿直出帝
命諸學士分草制質曰宮城已閉慮泄機事遂獨爲之辭理優贍
當時文士皆歎伏周太祖征李守貞每朝廷遣使齎詔處分軍事
皆中機會太祖問誰爲此辭使者以質對太祖曰宰相器也太祖
起兵入京師遽令草太后詔及議迎涇陰公儀注乃白太后以質
爲兵部侍郎樞密副使周廣順初拜中書侍郎同中書門下平章

事集賢殿大學士兼參知樞密院事世宗時累加司徒洪文館大學士恭帝卽位封蕭國公北邊奏太原劉承鈞結契丹入寇乃命我太祖北征爲六師推戴自陳橋入城還府第時質方就食閣中聞太祖入率王溥魏仁浦就府謁見質執溥手曰倉卒遣將吾儕之罪也爪入溥手幾出血溥無語旣見太祖質曰先帝養太尉如子今身未冷奈何太祖性仁厚嗚咽流涕曰吾受世宗厚恩今爲六軍所逼一旦至此將若之何軍校羅彥壤按劍厲聲向質曰我輩無主今日須得天子太祖叱之不退質知勢不可遏曰事已爾無太倉卒自古帝王有禪位之禮今可行也因具陳之且曰太尉旣以禮受禪則事太后如母養少主如子無負先帝舊恩太祖揮涕許諾然後率百官成禮太祖由此深敬重質太祖旣卽位加兼侍中仍以爲相乾德初封魯國公二年罷爲太子太傅卒年五十

四贈中書令初和凝知貢舉愛質所試文自以中第在第十三故亦以處質其後質官及封國皆與凝同當時謂之傳衣鉢太宗嘗言近世輔弼循規矩情名器持廉節無與質比者但欠世宗一死爲可惜爾子旻兒子杲

旻字貴參以父任爲千牛備身國初爲度支員外郎知開封縣太宗爲開封尹頗器重之嶺南平知邕州知淮南轉運事太宗時爲三司副使累官給事中判三司坐擅市竹木入官爲王仁贍所發貶房州司戶參軍移唐州以卒年四十六

杲字師回力學有文太宗時由鄧州從事爲直史館歷左拾遺補闕擢知制誥以工部郎中罷知壽州復爲知制誥當遷翰林學士太宗以其躁競不使居內職出爲右諫議大夫知濠州召爲史館修撰至京師而卒年五十六

王溥字齊物并州祁人也漢乾祐中舉進士甲科李守貞據河中趙思綰反京兆王景崇亂鳳翔周太祖將兵討三叛以溥爲從事三叛旣平朝士及藩鎮嘗以書往來詞意涉於悖逆者太祖籍其名欲按之溥諫曰魑魅伺夜而出日月旣照則氛沴消矣請焚之以安反側太祖從之太祖將大漸促召學士草制以溥爲中書侍郎同中書門下平章事已宣制太祖曰吾無恨矣世宗嘗問漢相李崧蠟彈書結北虜有記其辭者否溥曰使崧有此肯示人邪蘇逢吉輩陷之爾世宗遂優贈崧官世宗將討秦鳳溥薦向拱遂平之世宗因宴酌卮酒賜之曰成吾邊功卿擇帥之力也恭帝卽位加尚書右僕射國初進位司空乾德二年罷爲太子太保加太子太傅開寶二年遷太子太師太平興國初封祁國公卒年六十一贈侍中諡曰文獻後以溥諡同僖祖改諡文康溥在相位日父祚

以宿州防禦使家居每公卿至必謁祚引觴爲壽溥侍側坐客不敢安席祚曰此豚犬爾不煩諸君起人稱其孝敬子貽孫貽正貽正官至國子博士貽正之子克明尚太宗女鄭國長公主賜名貽永令與父同行

貽孫字象賢顯德中溥在相位以貽孫爲著作郎國初遷金部員外郎溥藏書至萬卷貽孫偏覽之太祖嘗問趙普拜禮何以男子跪而婦人不跪普訪禮官無知者貽孫曰古詩云長跪問故夫卽婦人古亦跪也唐武后時婦人始拜而不跪普問所出對曰唐幽州從事張建章著渤海記備言之普歎伏貽孫累遷右司郎中以卒

貽永字季長真宗以其故相家也選尚主除右衛將軍駙馬都尉明年主薨貽永累遷右監門衛大將軍蔣州團練使請試郡得知

單州徙徐州是時河決貽永作隄城南以禦水患詔褒之仁宗卽位改衛州團練使知澶州遷懷州防禦使拜耀州觀察使歷彰化武定軍留後拜彰德軍節度使知天雄軍改鎮保寧知鄆州自咸平中徙城而故治爲通衢密邇梁山泊春夏多病涉貽永相地築東西道三十餘里至今人獲其濟徙定州成德軍康定元年擢同知樞密院事改副使加宣徽南院使拜樞密使慶歷六年加同平章事明年封遂國公加兼侍中改鎮海軍節度使封鄧國公貽永以寵祿過盛願解樞柄乃聽罷侍中徙鎮彰德復以疾求去位除尚書右僕射兼侍中景靈宮使卒年七十一贈太師中書令諡曰康靖貽永性謹約寡言無綺羅聲色之好惟養鶉鴿數十愛玩而已

魏仁浦字道濟衛州汲人也少爲刀筆吏隸樞密院周太祖爲樞

密使問以卒乘數仁浦對曰帶甲者六萬太祖喜曰天下事不足
憂也漢隱帝遣使害太祖仁浦曰公有大功於朝廷握彊兵臨重
鎮以讒見疑豈可坐而待死教以易其語云誅將士以激怒心太
祖納其言遂長驅度河及卽位以爲樞密承旨世宗時爲樞密副
使陞樞密使拜中書侍郎同中書門下平章事集賢殿大學士兼
樞密使始議者以仁浦不由科第進世宗曰顧才如何爾遂用之
恭帝嗣位加刑部尚書國初進位右僕射乾德初罷開寶二年春
宴太祖笑謂仁浦曰何不勸朕酒乎仁浦奉觴上壽太祖密謂之
曰朕欲征太原如何仁浦曰欲速不達太祖領之從征太原至梁
侯驛遇疾而卒仁浦性寬厚接士有禮專務以德報怨世宗卞急
輕殺戮仁浦營救而免者十常七八從出征鋒鏑之下而無一人
橫死者有鄭元昭者爲解州刺史仁浦婦翁李溫玉爲樞密使元

昭不得專其利乃誣溫玉之子從李守貞叛捕以告變欲中傷仁
浦周太祖爲辨其誣獲免及仁浦大用乃以元昭典五郡又嘗爲
賈延徽譖幾遇禍總師出征有得延徽以獻者仁浦曰因兵戈以
報怨不忍爲也人稱其長者諡曰宣懿後以子咸信尚主追封齊
王

咸信字國寶國初昭憲皇后嘗至仁浦第見咸信奇之開寶中太
宗尹京以咸信尚永慶公主拜右衛將軍駙馬都尉太平興國初
爲吉州防禦使遷觀察使契丹人寇以咸信知澶州拜彰德軍節
度使真宗卽位徙鎮定國武成知曹州改知河陽又知澶州移鎮
忠武真宗升宋州爲南京以咸信太祖舊臣加同平章事判天雄
軍改鎮保平卒年六十九贈中書令咸信頗知書亦喜待士然性
吝嗇喜規利子昭炳至觀察使

臣傳曰自古治少亂多五代干戈之亂極矣天旣厭亂而思治故
真主勃興此范質王溥仁浦得以講揖遜之禮遂相藝祖於立國
之初而天下晏然也嗚呼以伊尹之聖太公之賢皆以夏商之舊
而歸湯文蓋以授受於天者有不庸釋則舍湯文將安歸乎由是
觀之質等所以歸有德爲無嫌也誠與夫賣國而趨利蒙恥而立
朝者有閒矣

東都事畧卷第十八終

東都事畧卷第十九

列傳二

韓令坤磁州武安人也令坤少隸周太祖帳下世宗卽位爲殿前都虞候高平之戰以功領容州團練使世宗征太原以令坤爲都校以功拜武定軍節度使世宗伐淮甸命令坤等十二將率兵以從襲揚州將吏聞周師至開門以迎之令坤整衆而入市不易肆人甚悅徙鎮鎮安又從世宗北征有功恭帝卽位爲侍衛馬步軍都虞候國初移鎮天平加侍衛親軍都指揮使同平章事太祖親征李筠令坤率兵屯河陽澤潞平以功加兼侍中從討李重進改鎮成德卒年四十六令坤有才畧識治道與太祖同事周情好親密鎮常山凡七年北邊以寧太祖聞其卒甚悼惜之追封南陽郡

王

石守信開封浚儀人也始事周太祖得隸帳下累遷指揮使世宗
征河東戰于高平守信以功遷親衛左第一軍都指揮使從征淮
南又從征關南俱有戰功自江州防禦使拜義成軍節度使太祖
受禪遷侍衛馬步軍副指揮使改鎮歸德李筠反守信與高懷德
率前軍破筠衆于長平斬首三千級又與懷德敗其衆三萬于澤
州澤潞平以功加同平章事李重進反復命守信討重進兼知揚
州行府事太祖親征守信馳奏城中危迫破在斯夕大駕親臨可
一鼓而平太祖從之卽日克其城移鎮天平兼侍衛馬步軍都指
揮使建隆三年請解軍職太祖許之守信每入朝宴賜甚渥加兼
侍中太平興國初加中書令爲河南尹從征幽州坐失律責授崇
信軍節度使兼中書令尋封衛國公徙鎮陳州卒年五十七贈尚
書令追封武威郡王諡曰武烈子保興保吉

保興字光裔本名保正太祖爲改之以蔭補供奉官稍遷至團練使雍熙初契丹寇邊保興爲澶州前軍駐泊徙銀夏綏府都巡檢常巡案罽子砮並黑水河趣谷中戎人數千騎度河邀戰保興伏兵于河滸俟其半渡急擊之其後數與戎人戰有功積官至棣州防禦使卒年五十八子元孫

保吉字祐之尚太祖女延慶公主拜左衛將軍駙馬都尉領愛州刺史以軍功擢至朔州觀察使守信卒起復爲威塞軍節度使知河陽大名府改橫海安國二鎮真宗卽位徙鎮保平景德初又徙武寧加同平章事契丹入寇真宗將幸澶淵先遣保吉與李繼隆爲排陣使對壘以待而虜騎數萬至城下保吉不介馬而馳當其前鋒虜引去旣而虜請盟真宗錫宴射於行營謂繼隆等曰北虜自古爲患今得其畏威服義息戰安民皆卿等力也保吉曰臣受

命禦寇上稟成筭至於布列行陣指授方畧皆出於繼隆繼隆亦曰宣力用心躬率將士臣不如保吉真宗嘉其能謙寵賜甚厚改鎮鎮安卒贈中書令諡曰壯武保吉有武幹奕世將相家積不貲而治生射利所至侵擾其鎮大名也葉齊查道皆知名士保吉悉命械頸而督運物論非之先是守信鎮宛邱年五十七而卒保吉繼居是鎮及其卒也年復與之同人皆異之

元孫字善長以守信恩補供奉官久之爲閣門祇候遷知京副使累擢至邕州觀察使鄜延路副總管會趙元昊反陷金明砦元孫與劉平戰于三川口爲賊所執仁宗以爲已死贈忠正軍節度使及元昊納款乃得歸言者請治其辱國之罪仁宗貸之安置全州後還京師卒年七十三

王審琦字仲寶河南人也漢乾祐初得隸周太祖帳下爲鐵騎指

揮使世宗征劉崇以功領勤州刺史審琦沉毅善謀所至有政績
世宗征淮舒州堅壁不下以郭令圖爲刺史命審琦司超將兵攻
城一夕拔之令圖入復見逐於郡人審琦方進軍援黃州聞令圖
被逐乃選輕騎銜枚襲城夜敗其衆而復納之遂以兵破紫金山
世宗圍濠梁審琦先拔其水砦乃降及攻楚州審琦謂城陷淮人
必遁因設伏以待之果如其言審琦仕周累遷至睦州防禦使宋
興擢爲殿前都指揮使奉寧軍節度使從征李筠改鎮義成討李
重進也副石守信將前軍出鎮忠正在鎮八年寬簡便民屬邑令
有以罪黜縣胥者僚佐以爲令不先白是輕主帥也請詰其罪審
琦曰五代以來諸鎮暴橫令宰之職不振久矣能斥黜吏是可嘉
也聞者歎伏從征太原改鎮許州加同平章事卒年五十贈中書
令追封琅琊郡王審琦素不善飲太祖宴之於後苑祝之曰審琦

布衣之舊方共享富貴酒者天之美祿也何惜不令飲之祝已謂
審琦曰天必賜卿酒量試爲吾飲之審琦受詔連十數酌無它苦
自此侍宴必引滿及歸私家卽不能飲或彊飲輒病也子承衍
承衍字希甫尚太祖女昭慶公主是謂秦國賢肅公主拜左衛將
軍駙馬都尉遷恩州刺史加防禦使太平興國初遷應州觀察使
授彰國軍節度使契丹入寇出知天雄軍端拱初徙鎮永清再知
天雄真宗卽位改鎮護國卒年五十二贈中書令諡曰恭肅承衍
善騎射曉音律好吟詠以功臣子尚主貴顯擁富貴厚自奉養而
性吝嗇爲世所鄙子世融終內園苑使世融之子克臣以進士第
元豐中爲工部侍郎終龍圖閣直學士子師約尚燕國公主拜駙
馬都尉英宗以前公主廢舅姑之禮主壻輒升行齒諸父英宗以
爲廢人倫不可爲天下法思所以釐正之神宗卽位推原英宗意